



晚安曲

天時轉暗下來，路燈一盞盞恬恬仔在路脣點著，過幾下點鐘添，這隻月就愛結束咗，換月過後，又係人生一個新階段個開始。

幾下日前佢就湊同事來去山頂行行啊，順續仔洗溫泉。佢等盡做得，就淨聽佢講起這件事，過來山頂食、歇个事情，一概都處理到好勢好勢。本成自家愛來安排，佢這兜嘅講恁多年來都分佢照顧，這擺就放手分佢等來服務。

等到月光吊啊半天頂咗，佢等幾下個男仔人浸啊在溫泉裡背，講等這幾年來共下擔任學校行政工作个辛苦同暢樂。講著歡喜个結果，聚概人都捋興；係講著壞蹄个事情，大家又接等仔道嘆。幾下年來个種種，又一個接等一個閃過，這時節山風吹來，分人十分鬆爽。佢一下同自家个心情放開，臥頭看等天頂个星斗，佢心肚仔緊愰，到底有幾久無臥頭看這兜星斗咗？今暗晡佢等仰會恁鬧？抑係佢等一直都恁仔，係自家無閒啊添放核欣賞佢等个風采？

就在自家看到呆核該下，忽然間嘅聽著費玉清唱个「晚安曲」。同事佢等聽著歌聲黏時就跣起來，講啊已經盡夜咗，好睡咗！佢看等佢等行開个身影，還在水池浸等个佢，目汁一下仔就跌下來。佢愰起做兵該下，擔任排長个佢，每暗晡總係在這曲「晚安曲」放核過後，一個兵仔、一個兵仔巡過，確定佢等睡落覺咗，自家正開始無閒自家个事務，等到事情做煞，輒輒都已經係第二班夜哨愛歸來咗。

退伍過後，在教育界服務，對一開始个擔任先生、主任，學校裡背个事頭，莫講校長个吩咐，就係一般同事拜託，總係佢等敢開嘴，佢就會盡力量去同大家人搵手做好來。就算下後擔任校長咗，係自家搵得著个，佢絕對出力。對學校恁仔，對屋下大大細細乜共樣，佢聚概都先渡好別人來正愰自家个享受。

愰起來，這幾十年來佢蓋像都係為著別人在生活，嘅佢呢？佢仰蓋像毋識為自家來過日仔！佢仰會恁戇？戇到連發病都在半夜送急診咗，等到天濛光，又本本去學校上班。佢仰淨曉得為著別人來過日仔，同別人謀福利，仰毋曉得為自家好好來過日仔？好得天公惜戇人，分佢在這幾十年來無麼个大難痛。愰著這，又害佢看毋清楚天頂个星斗咗！

「晚安曲」還本本唱等，佢同頭那沉啊溫泉裡背，等到會故無氣頭个時節，正同頭那探出來。佢辱水同面洗洗啊，目汁乜跣等洗下來。夜正式深咗！山風再吹過來，佢愰這下會感覺著涼爽，係因為佢肩頭頂个擔頭，毋使再過幾久就做得放下來。續下來个日仔，掌等日仔顧好自家就做得，伸个就同清風、明月來做伴咗！

作者：陳志寧

☆詞彙學習☆

【捋興】lod him：興緻勃勃。

【道嘆】to tan：唉聲嘆氣。

【鬧】nau：美麗。

【做兵】zo bin'：服兵役。

【夜哨】ia seu：從夜間十點開始的衛兵勤務。

【天濛光】tien' mung' gong'：第一道陽光出現的時候。

【辱水】fu sui'：用手捧水。